

Menteri arah tindakan segera tangani mendapan tanah di Bentong

- Oleh FITRI NIZAM
- 26 Julai 2023, 9:21 am



KEJADIAN mendapan tanah di KM66.1 arah timur dan barat (Bentong) yang telah menghalang lorong kiri dan kanan.

PETALING JAYA: Menteri Kerja Raya, Datuk Seri Alexander Nanta Linggi mengarahkan supaya tindakan segera diambil terhadap kejadian mendapan tanah di Kilometer 66.1 Lebuhraya Kuala Lumpur – Karak yang berlaku malam tadi.

Katanya, buat masa ini, semua lorong dari arah arah timur dan barat di lokasi kejadian ditutup sementara kepada semua pengguna.

Jelasnya, langkah tersebut diambil bagi memastikan keselamatan pengguna lebuhraya terjamin.

“Saya telah mengarahkan jabatan dan agensi yang terlibat supaya memberikan saya kemas kini kejadian ini kepada saya dari semasa ke semasa,” katanya menerusi satu hantaran di Facebook miliknya.

Berkongsikan mengenai kejadian tersebut, Alexander berkata, mendapan itu dilaporkan berlaku sekitar pukul 8.34 malam namun tidak melibatkan sebarang kemalangan jiwa mahupun kecederaan terhadap pengguna lebuh raya.

Menurutnya, mendapat berlaku di arah barat dan timur antara Persimpangan Bentong Barat ke Persimpangan Bentong Timur.

“Status terkini semua lorong arah timur dan barat. Pengguna ke Kuantan atau Karak dinasihatkan keluar di Persimpangan Bentong Barat dan masuk semula ke lebuh raya di Persimpangan Bentong Timur.

“Pengguna yang ingin menggunakan Lebuhraya Lingkaran Tengah Utama (Central Spine Road (CSR) untuk ke Kota Bharu dibenarkan menggunakan Persimpangan CSR.

“Pengguna ke arah Kuala Lumpur pula dinasihatkan keluar di Persimpangan Bentong Timur dan masuk semula ke lebuh raya di Persimpangan Bentong Barat,” katanya.
– UTUSAN